

This is a reproduction of a library book that was digitized by Google as part of an ongoing effort to preserve the information in books and make it universally accessible.

GoogleTM books

<http://books.google.com>



157 e. 26





Le ART de VENERIE,

par **Guyllame Twici.**

Ex MSS. Phillipps, No. 8336

Printed at Middle Hill Press, January, 1840.

Sumptibus D. Henrici Dryden, Bart.

Ici comence le Art de Venerie, le quel Mestre Guyllame Twici,
Venour leRoy d'Engleterre, fist en son temps, pur aprendre autres.

Touz ceus qe voelent de Venerye aprendre, ioe les apren-
dray, ausi cum ioe ay appris deuant ces heures. Ore vo-
louns comencer au lefre. E pur quey, sire, volez vous co-
mencer au lefre, plus tost qe a nul autre beste. Joe vous
dirray. Pur coe qe ele est la plus merveilleuse beste, ka
est en ceste terre. Il porte gresce, e crote, e rounge, e ceo
ne fet nule beste en ceste tere, for qe ly. E a la fies est il
madle, et a la fies est il female. e par cele encheson hom ne

poet nient corneer menec de ly, ausy cum len fet autres bestes, cum de cerf, e de sengler, e de lou. E si il fust tut dis madle, cum il est a la fiez madle, e a la fiez femele : hom poeit corneer menec de ly, ausy cum des autres bestes, cum de cerf, e de sengler, e de lou. E pur ceo qe totes les beles paroles sount foun-dees sour ly, quant vous le devez quere, la sunt les beles paroles. Il est enchase, e le cerf ausi est enchace, e le lou, e le sengler. Et vous, sire veneour, dites moy, quantez des bestes sunt aquilliz. Le deym, e la deyme, e le gopil, e la gopille, e tote autre vermine. Ore vodroi ioe savoir quantez des bestes sunt meuz de lymer, e quanz de bestes sunt trouez des brachez. Sire, tous ceaus qe sunt enchaces, sunt meuz de lymer. E touz ceaus enquillez sunt trovez de brachez. Ore est a demander, quantz des bestes sunt escorchez, e quantz des bestes sunt arachez ? Touz les bestes qe portent syu & fumees, sunt escorchez. E touz les bestes qe portent greace e fient, sunt arachez. E quantz des bestes portent fientes, e quantz des bestes portent fumees ? Touz ceaus qe portent syu, portent fumees. E touz ceaus qe portent gresce, portent fyentes ; saufe cely qe ieo nomay devaunt adeprimes : il porte gresce, e crote, e ne mye fientes. Ore est a demander, quantz des bestes portent os, et quantz des bestes argos. Le cerf porte os, e le sengler, e le deym, argos. Pur quey, vous veneour, est il apele sengler ? Pur ceo qe adeprimes est il apele purcel, taunt cum il laite la mere. Et quant la mere les ad lesse, sunt il apelez goreaus, e tut lan apres. Le tierz an, sunt il apelez hogastres. E quant il est de quatre annees, il doit partyr hors de la soundre par age. E quant il est partyr hors de la soundre, qe il va soul, par cel encheson, est il apele sengler. Ore alom al cerf, e parloni de ly en ses degres. Fet a savoyr, qe le premer an si est il veel ; le secund an, broket ; le ters an, espeyard.

le quart an, sour, le quint an, graunt sour, le sime an, Cerf de la premiere teste. Ors, sire veneour, quei auera il de teste quant il est de la premiere teste ? Respouns. Ceo ne chiet nient en jugement de veneour, pur la diversete trove en eaus, fors touz jours le appeloms, Cerf de la premiere teste, taunt qe il seit de dis desmeindres. De quantz de Ramouns deit le Cerf estre, avaunt qe il seit, Cerf de dis desmeindres ? Respouns. Adeprimes covient il, qil eit porche, e pus autilor, e pus real, e pus souz real, e pus fourche de aumbe deus les partz de la teste; e a dunkes est il cerf de dis des meindres. E quant il ad autilor, e real, e souz real, e fourche de la une part, e troche de lautre part, a donkes est il Cerf de dis desgreindres. Et quant il ad tut ceo que ieo ai nome devaunt, issi qil est troche de ambe deuz les partz, il est de xii des meindres. Et si issi seit qil est troche de la une part, de treis; et de lautre part, de quatre; donkes est il de xii desgreindres. Il ne puet mie estre de quatorze. Entre cent, vous ne trouverez mie deus acordaunts aquatorze. Quant il est troche de une part de quatre, et de lautre part de cinkes, dount est il de xvi des meindres. Quant il serra troche de aumbe part de cinkes, dount est il de xvi desgreindres. Quant il serra troche de une part de cinkes, et de autre part de. vi. dount est il de. xviii. desmeindres. Quant il serra troche de aumbe part de. vi. dount est il de xviii desgreindres. Quant il serra troche de une part de. vi. et de autre part de. vii. dount est il de xx desmeindres. Quant il serra troche de aumbe part de. vii. dount est il de xx desgreindres. Quant il serra troche de une part de. vii. et de autre part de. viii. dount est il de xxii desmeindres. Quant il serra troche de aumbe part de. viii. dount est il de. xxii, desgreindres. Quant il serra troche de une part de. viii. e dautre part de. ix. dount est il de xxiv des meindres. Quant il serra troche de aumbe part de. ix. dount il est de xxiiii des-

greindres. Quant il serra troche de une part de. ix. et de autre part de. x. dount est il de. xxvi. des meindres. Quant il serra troche de aumbe part de. x. dount est il de xxvi des greindres. Quant il serra troche de une part de. x. et de autre part de. xi. dount est il de xxviii des meindres. Quant il serra troche de aumbe part de. xi. dount est il de xxviii des greindres. Quant il serra troche de une part de. xi. et de autre part de. xii. dount est il de xxx des meindres. Quant il serra troche de aumbe part de. xii. dount est il de xxx des greindres. Quant il serra troche de une part de. xii. et de autre part de. xiii. dount est il de xxxii des meindres. Quant il serra troche de aumbe partz de. xiii. dount est il de xxxii des greindres. Et quant il avera tout ceo, dount est il cerf resigne. Et pur quey est il cerf resigne? Pur ceo qil est Cerf resigne de teste, qe la teste, ne li crest nient plus. Et si mil home vous die, qil ad veu teste de plus de Ramouns, que ieo ne vous ay nome de acrees natureel, de xxxii aunz; Respondez baudement, qe ce ne fu pas cerf de ceste terre. Ore, sire venour, est ceste aprise certeyne de toutz manere cerfs? Respouns. Sire, na nyl, mes de cerfs qe sunt de bone pasture. Car la teste li crest solum sa pasture, bone ou autre. Ore est il a saver, de quantz des bestes deit hom corneer menec? Vous devez corneer menec de treis madles et de une femele, ceo est du cerf, e du sengler, e del lou, et de la lowe, ausi de souz le lou cum de sus le laroun. Ore coment devetz vous corneer, quant vous avez meu le cerf de vostre lymer. Vous devez corneer apres la moete deus mootz. Et si vos chiens ne viennent mie a vostre volunte s. hastivement cum vous vodriez, vous devez corneer quatre mootz pur hastier la

gent ver vous, e pur garnier la gent, qe le cerf est meü, dunkes devez vous rechater sus vos chiens treis fiez. E puis quant il sunt en loygnes de vous, vous devez chater en la manere cum ioe vous dirroie, vous devez corneer, trout, trout, trouourout, trout, trout trouourout, trouourout, trouourout.

Vous veneour, pur quey, cornastes vous en ceste manere ? Pur ceo qe jeo fu a moun dreit, e le cerf est meü, et je ne sai ou les chiens sunt devenuz, ne le gentz, e pur ceo cornay jeo én ceste manere. En quel chasce appeloms ceo la ? Nous apeloms ceste chace, "La Chace de Forloyng." Vous chasciez auekes les chiens, que sunt devaunt, e rechatez apres ceus que sunt envenauns. Une autre chasce il y ad, qe homme appelle "Le Parfet." Dunkes covient il, qe vous corneez en autre maneres, e ceo est issi. Vous devez comencer par moot, e dire, trouourout, trout, trout, trouourout, trouourout, trouourout, trout, trout, trouourout. E comencer par un autre moot autrefois. E issi devez vous corneer treis fiez, E comencer par un moot, e finer en un moot. E isse chescun homme qest en tour vous, que siet de venerie, puet conustre en quel point vous estes, en vostre dedut, par vostre corneer. Une autre chasce il y ad, quant une chasce est assis des archers, et des lefrers, e de establie, e les bestes passent hors de bounde, e les chiens apres ; donkes devez vous corneer en ceste manere ; un moot, e pus rechater trouourout, trouourout, trouourout. Vous veneour, pur quey corneez vous issi ? De aver les gentz, que sunt en tour la chace, a moy, e rechater les chiens que sunt passez hors de bounde. Queus boundes sunt ceaus la ? Les boundes sunt ceaus, que furent assis des archers, e des lefrers, e de establie, e par cel encheson cornay ieo un moot, e rechatay sus les chiens. Vous veneour, volez vous avower

cele chace ? Oyl, sire. Si cele beste seit enquillee, ou en chacee, ieo lavoweray. Si issi seit que les chiens soient passez hors des boundes : Dunks voil ieo corneer un moot, e estraker apres mes chiens, pur aver les arere ; ieo ne voil mie qil courent plus avaunt. Un mot pur assembler nos gentz, e aver nos chiens ariere. Quantz des bestes portent peaus et quantz des bestes portent quirs ? Touz ceaus que sunt escorchez, portent quirs. E tous ceaus qe sunt enrachez, portent peaus. Quant vous devez quere le lefre, si vos chiens sunt laas, e ne voelent une courre volunters, vous devez dire "avaunt, sire, avaunt." E si il eient grant volonte de courre, e il se aloyguent de vous, vous devez dire un autre parole ; " Hou, mon amy, hou ; swef, mon amy, swef." E si le chien troeue de li, la ou il ad este, sil lad a noun, " Beaumon," ou, " Richer," " oyez a Beaumon le vailjaunt, que il quide trover le Coward, od la courte cove." Quei est a dire, " Sha hou," Sha hou, est a dire, cum, " " sha ho," Mes, pur ceo que nous dyouns, " sha hou," pur ceo qil est plus courtement a dire qe " sha ho." Quant le lefre est pris e les ount coru aly, vous devez corneer prise, e vous devez doner as chiens le halou. Quey est le halou ? Les Coustex et les espaules, e le cool, e la teste, e la leigne, demorra a la quisine. Quant le Cerf est pris, vous devez corneer quatre mootz, et il serra defet, si cum un autre beste. Et si issi seit qe ses chiens sunt bauds, sil ount pris le cerf aforce, le venour avera le quir, e cely qe escorche la teste avera la espaulde par resou, e les chiens serrunt rewardex del cool e de la bowaylles, et de la faie, et il serra mange sur le quir. E pur ceo est il apelee quyrraye. La teste serra porte a lostel, devant le Seygnour, e le queor, et la couwe, e le gargylloun, sour une fourchette. E la menes doit

estre oornée al vys de la sale, quant il est porte aloustel. Quant le Deym est pris, vous devez corneer prise, e vous devez rewarde les chiens de la paunche, e de les boweaux.

Sire venour, coment deit homme conustre le cerf, quant il vient de sa pasture, en quele pasture il ad este, ou en furment, ou en aveynne, ou en feves, ou en poys?

Jeo vous dirray : si les fumees seient iaunes, et en gleymes, ceo est de furment, ou de aveyne. Et si il ad este en peys, ou en feves, si le cerf est cras, les fumees serount neyrs, e engleymes, e la fumees menuwe. En Ivern quant il est megre, les fumees serount neyrs e gros e ne mie en gleymez. Quant le sengler est pris, il serra defet tut velu, e les boeaus serount broilliez, e donez as chiens, e pain avoeke, e ceo est apele reward, E pur quey nest il mie appele quyreye, si cum del cerf. Jeo vous dirray ; pur ceo qil nest pas mange sur le quyr, si cum del cerf. Quant des hastiletz deit hom avoir du sengler, kaunt il est defet ? Puis que vous le demaundez, Jeo le vous dirray : Il y ad deus menuz hastiletz, qe serount pris de les deus quisses dedeins, pus yl y ad la teste, pus le coler, pus le espauls, e les costez, pus les filetz, pus les haunches, e le qoer, e le pomoun, e lez perles, e la eschine qe serra copee en quatre, e les gambouns. Et quant il est tut appaillie, il avera xxxii hastiletz del sengler, par dreit. Quant des herdes sunt des bestes ? De Cerfs et de Bises, o Deyms, e Deymes, Beorie, des Chevereaus, Soundre dez porcs. Les chevereaus ne sunt mie enchacez ne aquylles, mes il croysent la ou il venut de vaunt les chiens. Quant il est pris, il serra aporte a la quysine, tut entyer ; e les chiens serount rewardez de les peez, e le peaul demorra a la quysine. &c.

262

